

# DBKU lancarkan Kelab Berbasikal Bandarayaku

**KUCHING:** Dewan Bandaraya Kuching Utara (DBKU) melancarkan penubuhan kelab berbasikal dikenali sebagai Kelab Berbasikal Bandarayaku di Esplanad Kuching di sini, semalam.

Penubuhan kelab yang pertama seumpamanya itu didorong oleh kesedaran mengenai kepentingan menjadikan amalan gaya hidup sihat sebagai budaya dalam kalangan masyarakat.

Pelancaran disempurnakan oleh Datuk Bandar DBKU Datuk Abang Abdul Wahap Abang Julai disertai oleh Ahli Dewan Undangan Negeri (ADUN) Pantai Damai, Dr Abdul Rahman Junaidi serta ADUN Samariang Sharifah Hasidah Sayeed Aman Ghazali.

Sempena pelancaran itu, turut diadakan program 'Fun Ride' yang disertai oleh seramai 300 peserta terdiri daripada kakitangan DBKU, ahli-ahli Persatuan Berbasikal Kuching, anggota polis, ahli-ahli PBB Petra Jaya, UNIMAS serta Hospital Normah.

Setiausaha kelab Noraini Karim berkata, 'Fun Ride' semalam dibahagikan kepada dua kategori iaitu VIP sejauh 10 kilometer (km) dan cabaran terbuka sejauh 20 km.

Jelasnya, kelab yang ditubuhkan pada awal bulan



**IKUT SERTA:** Abang Abdul Wahap (kiri) dan Dr. Rahman (kanan) mengambil bahagian dalam aktiviti 'Fun Ride' kategori VIP sempena pelancaran Kelab Berbasikal Bandarayaku di Esplanad Kuching di sini semalam. — Gambar Muhd Rais Sanusi

Oktober lepas bertujuan mempromosikan budaya berbasikal dalam kalangan warga kerja DBKU dan membolehkan mereka menyertai pelbagai aktiviti sukan berbasikal.

"Sukan berbasikal merupakan kegiatan riadah yang menyihatkan tubuh badan malah membantu DBKU merealisasikan langkah mewujudkan bandar raya Kuching sebagai bandar raya yang bebas daripada pelepasan asap dan gas karbon monoksida.

"Selain mempromosikan gaya hidup sihat dalam kalangan ahli, ia juga bertujuan mewujudkan kesedaran dan menyemai minat dalam ka-

langan masyarakat khususnya belia terhadap penjagaan kesihatan melalui aktiviti berbasikal," katanya.

Kelab Berbasikal Bandarayaku juga bertindak sebagai saluran bagi pihak DBKU mendekati masyarakat untuk mendapatkan maklum balas daripada warga kota mengenai perkhidmatan yang disediakan oleh DBKU.

Antara program awal yang dilaksanakan oleh kelab ini selepas penubuhannya adalah program berbasikal di kawasan bandar raya Kuching bagi program World Walking Day anjuran Nestle, 27 Oktober lalu.